

1 TESARÓNKA

Merepanika Paoro Iokanatsopatakiti Tesarónika Auakanimoni

1 ¹Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hïte.

Paoro Misäkiretari Teoso Tesarónika Auakani Ìkapani

²Amisäkiretari Teoso hïte ìkapani. Ìtipirika atxari Teoso: “Peerekai pite, kotxi Tesarónika auakani auikari pisäkire,” atxari.

³Aïri Teoso amisäkiretakasaaki, axinikapikari hïte parïka Teoso ìkapani. Atão hïparïkauata, kotxi iteene hãuikari iua sãkire. Axinikari hïparïka Teoso ìkapani, kotxi iteene hïtoretari iua. Axinikari himarotiniiri Apiananiri Xesosi Kristo sãkire iaõka hïkamini. Hïpoxokoniritika hiãtapari isãkire iaõka apokini.

⁴Nitariakori, Teoso turetapatikai hïte. Iua mereëi hïte iua nakitiakori hininiua ìkapani. Aimarotari ikara. ⁵Teoso iokanapirena erekari hïtemoni asãpireta Teoso posotiireë. Ate sãkirenoka !kaposotiireri. Erekari Matamatakoti oerekai asãkire atão inini. Hïte iteene imarotari asãkire atãonoka inini. Hãtamatarari aparïka hïte ìkapani hïte sauaki aãuakasaaki, ininiã himarotapitikaua ate. ⁶Ininiã hïte kamari ate kamakiti atokotxikana. Hïkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai.

7Ininiãkara Masetónia tixini auakani, Akaia tixini auakani pakini nirekari hïte atoko ininina. 8Inirekarina hïte atoko ininina, kotxi hïte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iaripireta hïte iteene auikiniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. 9Ikinimane sãpiretari hïpoxokoniritika hãpakapiniua ate. Ninoa sãpiretari hïte takanapiniri teoso kamakori. Isãpiretarina hïparïkauatini uatxa Teoso atão inakari ïkapani, auãkipika inakari ïkapani. 10Ninoa sãpiretari, hïte iãtapiniri Teoso ãkiri itixine auakari kanapiriini ïkorapokoriti. Iua Xesosi. Ipïkani sauaki Teoso ôkitikakiti iua. Iua makatxakapekari amaerekani, ininiã amisiritiko !auaika kãkiti misiritiko ôti apokasaaki.

Paoro Parïka Tesarónika Sitatxitiã

(Atosi 17.1-9)

2 1Nitariakori, himarotari maxikatiïka kona ate sari hïtemoni. 2Himarotari amisiritiko Piriposi sitatxiti aãuakasaaki, hïtemoni aãpokini apisa. Iuaã auakani ãsokaua, kateia ãki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hïtemoni. Itori kãkiti !nirekari asãkire, iuaritika ate sãpiretari Teoso iokanapirena erekari hïtemoni. 3Ate oerekakiti !akeroka. Teoso nireëkitinoka anireka akamini. ãTi anireëkiti !auari. !Anirekari amisirienetini hïte.

4Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkirauata, kona kãkiti akamapoxokonitini ïkapanini. Anirekari akamapoxokonitini Teoso, kotxi iua ataerekatari aãkixinire. 5!Asãpiretai erka hinini, ate nireëkiti hïkamini ïkapani. Asãpiretari Teoso sãkire hïtemoni, kona hïte nakiti anirekini ïkapanini. Ikara himarotape. Teoso apaka imarotari ikara nisãkire atão inini. 6Ate !anirekari kãkiti iuikiniua ate. !Anirekai hïte iuikiniua ate. !Anirekari apanakini iuikiniua ate. Kristo iokanatakiniraua ate hïtemoni, ininiã aposotari apaniãtinii ikinipoko anireëkiti hïsikiniua. Iuaritika !anirekari ikara atoko akamini. 7Hïte sauaki aãuakasaaki iteene atiretai hïte. Sito tiritiniri oimi atokokana, ate tiretai hïte. 8Iteene atiretai, ininiã anirekari asikinii Teoso iokanapirena erekari. Kona iuananini anireka asikinii hïte. Axinire, aïto pakini anireka asikinii, kotxi ate tirketakini hïtxapekaua. 9Nitariakori, hïxinikari aparïka

hĩte sauaki. Pasãpaniri. Ìkanõka, pokamara pakini aparĩkauatapitipo, akiena, anireẽkiti pakini aãpakapini ìkapani, kotxi !anirekari aamanainii hĩte aamonitakiti ìkapani. !Anirekari hĩte parĩka apiatini ate ìkapani, Teoso iokanapirena erekari asãpiretakasaakii.

¹⁰Hĩte Kristo sãkire auiãkani sauaki aãuakasaaki, hĩte itikari aãuini ikiniõtika. Teoso apaka itikari. Himarotari Teoso nireẽkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹Hĩri atoko atxaua iusaaki, kotxi aõtãkikai hĩte. Amĩkapiritai, imi iri mĩkapiritini atokokana. Apaniãtai atão inakaranoka hĩkamini. ¹²Ikara atoko akaminii, kotxi Teoso anaakori hĩtxaua, ininiã anirekari hĩte kaminiri hĩri kamakiti iaõka. Iua akiritai hĩte hãuĩte inini ìkapani. Inirekari hãtamatini iua iotximere itixine hãuakasaaki. ¹³Ininiã ãtipirika amisãkiretari Teoso: “Erekapitikai, kotxi Tesarónika auakani auikari pisãkire, ninoamoni asãpiretakiti. Ninoa imarotari kona ate sãkireni asãpiretana. Ninoa imarotari asãpiretana atão pite sãkire,” nitxari Teoso. Teoso sãkire parĩkauata hĩte Xesosi sãkire auiãkani ãkixinireẽ isãkire hãuikini ìkapani. ¹⁴Xotẽia tixini auakani, Kristo Xesosi nakitiakori, Teoso sãkire auiãkani, ninoa kamakiti atoko hĩkamako hĩte nitariakori. Xoteoakori misiritana ninoa. Iua atokotxikana hĩte nirimane misiritapekai hĩte. ¹⁵Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sãkire sãpiretakani. Ninoatxikana misiritapekua ate. Teoso !apokaerekatari ninoa kamakiti. Ninoa omanatari kãkiti. ¹⁶Kotxi !auritarina Xesosi sãkire asãpiretini Xoteo minakanuia, imaerekanina makatxakiko ìkapani. Uatxa ninoa maerekani xãpoka. Uatxa Teoso omanãkare apokapeka ninoamoni.

Paoro Ipiãtinina Tesarónika Auakani

¹⁷Ãtiãtaã ate auakasaaki, ãtipirika axinikapikai. Aĩto hĩtekata mauakanisaaki, aãkixinire xinikapikai. Ate ipiãtai. Iteene anirekari iuaĩkana aõkitinii. ¹⁸Anirekapitikamari hĩtemoni akanapiriini. Nota Paoro itokata nirekamari napokini hĩtemoni, txamari Satanasi !auritaua asini hĩtemoni. ¹⁹Aãuĩte Xesosi ãti õti ikanapiriãkasaaki, aãpotiitaua iua apisatoõ. Iusaaki aiãtapakiti apokapeka. Kipa aiãtapakiti? Hĩtera. Iusaaki iteene apoxokoniuatoko. Kinirepa apoxokoniuata? Kotxi hĩte aua iuaã. Iusaaki aãpakapari aparĩka ìki. Kinirepa aãpakapari aparĩka ìki? Kotxi hĩte auikari Xesosi sãkire ate sãpiretakiti. Ininiã

peerekari iusaaki. ²⁰Atãopitikara nisãkire. Ate iukai hïte. Hïte kamapoxokonitaua ate.

3 ¹Iusaaki !amïteenekari amimaropiretakanii hïte, ininiã axinikari atenoka kaikota uai Atena sitatxitiã. ²Ininiã iusaaki aiokanatarì aïtari Tximótxio hïtemoni. Teoso nitiri itxaua. Imoianataua Kristo iokanapirena erekari asãpiretakasaakiri kãkiti. Aiokanatarì iua hïtemoni, Xesosi sãkire iteene hãuikini ìkapani, isikataparaxiniretinii ìkapani. ³Ikara atoko ininiã, kona hïxinikari Teoso sãkire hïtakanapini, kãkiti misiritinii xika, kotxi himarotari amisiritiko apokapitikako. Teoso auiritari. ⁴Hïtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵Ininiã apikomoni !nimïteenekaikari nimimaropiretakanii hïte. Ininiã iusaaki niokanatarì Tximótxio hïtemoni, Xesosi sãkire hãuikini nimarotini ìkapani. Nipïkari Satanasi sikanireõtini hïte, Xesosi sãkire hãuikini hïtakanapini. Nipïkari maxikatiïka Xesosi sãkire asãpiretinii hïte, hïtekata aãuakasaaki.

Tximótxio Sãpiretakiti Ikanapiriãkasaaki

⁶Uatxa Tximótxio kanapiripeka atemoni. Iua minapiretai hïte. Erekari isãpiretakiti. Iua txaua ate: “Tesarónika auakani iteene auikari Xesosi sãkire. Ninoa tiraõkiuatapika. Ipotxitarina ixinikiniina hïte. Ipiãtaina hïte, ninoa hïpiãtini atokotxikana,” itxa Tximótxio atemoni. ⁷Nitariakori, ate amaxikiko auapitika. Ate misiritiko auapitika, iuaritika hïkamapoxokonitaua, kotxi iteene hãuikari Xesosi sãkire. ⁸Uatxa peerekari ate auini, kotxi Apiananiri sãkire iaõka hïkama. ⁹Iteene apoxokoniua Teoso apisatoõ, kotxi hãuikari iua sãkire. Axinikasaakii, apoxokoni iteene auapitika. Ininiã ãtipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰Ìkanõka, pokamara pakini iteene aamanaãri Teoso hïte iuaïkana aaõkitini, kotxi anirekari apikomoni Teoso sãkire himimarotakiniti aõerekinii.

¹¹Anirekari aïri Teoso, aãuïte Xesosi Kristo pakini oerekiniãua aãpokini hïtemoni. ¹²Anirekari Apiananiri txïkitakinii himarotiniri hïtoretakiniua. Anirekari hïtiraõki aneini. Anirekari iteene hïtiraõkiuatini. Anirekari ikinimane apaka hïtiretini, ate tiritinii hïte atokotxikana. ¹³Anirekari Apiananiri sikataparaxiniretinii hïte. Ininiã Apiananiri Xesosi Kristo ikinika inakitiakorikata ìkasaaki uai, iusaaki maerekati !auaika hïtemoni

aĩri Teoso apisatoõ. Iuasaaki hĩte apoĩtakari !auari. Iuasaaki erekai hĩte.

Akamakiti Teoso Apokaerekatakiti

4 ¹Nitariakori, apikomoni nisãpiretai. Asãpiretapekai hĩkamakiti tĩkane, hãuini Teoso apokaerekatini ĩkapani. Ikara atoko inakari hĩkamapitika uatxa. Erekari hãuini uatxa, ininiã nõtãkikai Apiananiri Xesosi posotiireẽ, apikomoni iua apokaerekatakiti ikiniõtika hĩkamini ĩkapani. ²Himarotapitikari aõereẽkiti hĩkamini ĩkapani. Apiananiri Xesosi paniãtaua ikara aõerekinii hĩte.

³Teoso nirekari himaerekani xipokaãpotini hãkixinireẽ. Ininiãkara hĩtaniri minakotikatika, hĩtanoro minakotokatika, !hĩsirĩkape. ⁴!Hãuiritapiri hĩito nireẽkiti ikamini. Hĩito auĩte hĩtxauako, ininiã maerekati hĩito nireẽkiti !hĩkama. Atão hĩpaxitariko hĩteka ĩto, apanakini ĩto apaka. ⁵!Apakata hĩxinikiniri ãtipirika maerekati hĩito nireẽkiti ãti ĩtokata hĩkamini. Xoteo minakanuia, Teoso mimarotakani, xinikari ikara atoko inakari. ⁶!Apakata hĩtxĩkitakiniri ãti aĩtari maerekati ĩtotxi nireẽkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apinitapekai. ⁷Teoso kona akiritaua iuamoni, maerekati aĩto nireẽkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸Ininiã ikara asãkire manirekakati, !omanataua ate. Omanatari Teoso. !Nirekari Teoso sãkire, kotxi Teoso sikari Erekari Matamatakoti kãkitimoni.

⁹Hĩtariakori hĩtiretini pirena kona aiõkatsopata hĩtemoni, kotxi Teoso oerekapakai hĩtiretakiniua. ¹⁰Nimarotari hĩtiretiniri ikinika hĩtariakori Masetónia tixini auakani. Iuaritika nitariakori, aõtãkikai apiata hĩtiretiniri kãkiti ikiniõtika. ¹¹Hãpaiaõkariko hĩtsorĩkaãtini. Apanakini parĩka !himaãkatape. Hĩkamariko hĩteka parĩka hãuini ĩkapani. Ikara atoko asãpiretapekai hĩte. ¹²Ikara atoko hĩkaminiã, Xesosi sãkire mauiãkani paxitai. Ikara atoko hĩkaminiã, !auari hiamonitakiti.

Apiananiri Kanapiriini

¹³Nitariakori, anirekari himarotiniri atão inakari ipĩkani pirena. Kona anirekari himatinaniuatini Xesosi sãkire mauiãkani matinaniuatini atoko, kotxi ninoa ipĩkasaaki, !imarotarina isinimonina. ¹⁴Aãuikari Xesosi ipinini. Aãuikari iuaĩkana õkitikiniua.

Ininiākara aãuikari ipĩkani Teoso sãkire auiākani apaka õkitikiniua. Teoso minana ninoa Xesosikata ikanapiriākasaaki. ¹⁵Iuasaaki ate auãkipanika inakanuia Apiananiri kanapiriākasaaki, !asari ninoa mitxi ipĩkani apisapanika. Mitxi ninoa sa. Iposo atoko ate sa Apiananirimoni. Apiananirira sãpiretapekaua ikara. ¹⁶Iuasaaki Apiananiri potorika itixine. Iuaka katxaka uaimoni. Iuasaaki akiripoakata iua apokasaaki, ininiã kãkiti kenakotariko Teoso nitiriakori auĩte sãkire. Teoso trõpetane xõkiko kenakotaãka. Iuasaaki mitxi ipĩkani, Kristo sãkire auiākani, merepanika õkitikauako. ¹⁷Eereka ate auapanika inakanuia anikaãkako ipĩkanikata Apiananiri aaõkitini ïkapani. Aaõkitari iua itanoxiti katxiãriã. Ininiã eereka iuakata aãuapininiika. ¹⁸Ikara sãkiretxiti hĩsãpiretakakauako, ininiã hĩkamataparaxiniretakakauako.

Apiananiri Kanapiriini Ôti

5 ¹Nitariakori, kona asãpiretari Xesosi kanapiriini õti. !Asãpiretari apokini kasiriti, ikanapiriinikanani pakini. ²Kotxi atão himarotari, Apiananiri uai apokini, kiĩtiriri ïkanõka apokini atokokana itxako. Ininiã kãkiti !imarotari Apiananiri apokini õti. ³Iuasaaki kãkiti sãkire: “Nenamtxi !uari. Erekaua. Imonõkoni !uari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiĩkini atoko itxako. Oa sito tsii apokasaaki, omitekini !uari. Iua atokokana kãkiti mitekini !uari iuasaaki Xesosi kanapiriākasaaki. ⁴Nitariakori, kãkiti ipiã auakani atoko !hĩtxaua. Himarotapitikari ãti õti Apiananiri uai kanapiriini, ininiã hiãtapari ikanapiriini õti apokini, himatikokakani ïkapani, kiĩtiriri tikokakiniri kãkiti atoko himinakani ïkapani ikanapiriākasaaki. ⁵Hĩte hĩkinika kaiotximereri anaakori hĩtxaua. Pokamarari anaakori atoko hĩtxaua. !Akaikota ipiã. !Akaikota ïkanõka, kotxi !anirekaikari maerekati akamini. ⁶Ininiākara apanakini imakakani atoko !himapeko. Araõkire matxako, maerekati mapokakani ïkapani. Aĩto auĩte matxaua. ⁷Imakakani imaka ïkanõka. Poãtakani poãta ïkanõka. !Iãtapari Xesosi kanapiriini. Ikara atoko !hĩtxapeko.

⁸Pokamarari anaakori atxaua, ininiã aĩto auĩte matxaua. Sotato takari itorota koana, itorota tokapare ïkapani. Sotato torota koana atoko itxa Teoso sãkire iteene hãuikini. Sotato torota koana atoko itxa apaka hĩtiraõki. Ininiã hãuikasaakiri Teoso sãkire, hĩtiraõkiuatakasaaki, hãkixinire tokapare auape. Sotato takari ikii tãta ikii tokapare ïkapani. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare

itxaua. ⁹Teoso mereëua ate kona imisiritiniua ïkapanini. Iua mereëua ate amaerekani aäuïte Xesosi Kristo makatxakini ïkapani. ¹⁰Iua ipina kãkiti ïkapani. Ipina iuakata aäuïni ïkapani. Ikanapiriãkasaaki, isãkire auiãkani auãkipanika inakani, ipïkani pakini aua iuakata. ¹¹Ininiã hïsikataraxiniretakakauako. Himoianatakakauako Teoso sãkire iteene hãuïkini ïkapani. Uatxa ikara atoko inakari hïkamapeka.

Paoro Ôtãkikare Mapotõkire

¹²Nitariakori, aõtãkikai himarotinina hïte sauaki parïkauatakani, Apiananiri sãkire sãpiretakani, hïte ôtãkikakani. ¹³Ininiã iteene hïpaxitanako. Hïtiretanako ninoa, kotxi ninoa iteene parïkauata hïte ïkapani. !Hïtxitakakapeua. !Hineenamauatape. ¹⁴Nitariakori, iteene aõtãkikai hïte ia atoko: Hïpinitariko kãkiti paniãtakiti makïpitakani. Hïsikataraxiniretariko pïkarauatakani. Himoianatariko mataparani. Katima !hïtxapeko homanãkarauatini kãkiti kerokasaaki. ¹⁵Kona hãuiritapiri misiritakori misiritiniri imisiritakiri. ãtipirika hïkamariko erekari hïtariakorimoni, Xesosi sãkire mauïãkanimoni apaka.

¹⁶ãtipirika hïpoxokoniuatako. ¹⁷Himisãkiretapikariko Teoso. ¹⁸Hïpoxokoniuatakasaaki, hïtxariko Teoso: “Erekari pikamakiti nota ïkapani,” hïtxako. Himatinaniuatakasaaki, iuaritika hïtxariko Teoso: “Erekari pikamakiti nota ïkapani,” hïtxako. Ikara atoko Teoso nirekari ãtipirika hïsãpiretiniri iua, kotxi Kristo Xesosi nakitiakori hïtxaua. ¹⁹!Hïotokakapiri Erekari Matamatakoti parïkauatini hãkixinireë. Hïkamariko ipaniãtakiti. ²⁰!Homanatapiri Teoso sãkire kãkiti sãpiretakiti. ²¹Hãtaerekatariko ikinika. Erekarinoka hïkamako. ²²!Hïsipeko maerekati kamikoãtaã, kotxi hïsiniã, apanakini xinikari atão maerekati hinireka hïkamini.

²³Anirekari Teoso, kãkiti kamaerekaxiniretakari, iua iteene kamaerekatinii hïte iua nakitiakorinoka hininiua ïkapani. Nimisãkiretari Teoso hïte ïkapani, hïxinire, hãkixinire, hïïto pakini ereka inini, ininiã aäuïte Xesosi Kristo uai apokasaaki maerekati !auaika hïtemoni, ininiã hïte apoïtiko !auari. ²⁴Hïte akiritakari kamari isãkire iaõka.

²⁵Nitariakori, himisãkiretariko Teoso ate ïkapani. ²⁶Haõkitakakasaakiua, hïtiraõkiritika hãpakapakauako, kotxi hïtariakori itxauana. ²⁷Apiananiri posotiireë nipaniãtai hãtatsopatiniri ia niokanatsopatakiti ikinika aïtariakori kenakotini ïkapani. ²⁸Aäuïte Xesosi Kristo sikari ikinipoko erekari hïtemoni. Ameë.